

На стиховне стихиры самогласны, глас 1:

[Андреа Критскаго:]

Яже по вся грады узы и скорби твоя,/ кто скажет славне апостоле Павле?/ Труды, болезни и бдения,/ яже во алчбе и жажде злострастия,/ яже в зиме и наготе, кошницу, и жезлобиения,/ каменометания, и обхождения, глубины истопления:/ позор бысть ангелов и человеков./ Вся убо претерпел еси, о укрепляющем тя Христе:/ да мир приобретаеши о Христе Иисусе Господе твоём./ Темже молим тя, творящий память твою верно, // непрестанно моли, спаситися душам нашим.

Стих: Во всю землю изыде вещание их,/ и в концы вселенныя глаголы их.

Яже по вся грады вязания и скорби твоя, кто исповесть славне апостоле? Или кто представит подвиги и труды твоя, имиже трудился еси во Евангелии Христове, да вся приобретаеши, и Христу приведеша Церковь? Но сию проси сохранить доброе твое исповедание, даже до конечнаго издыхания, Павле апостоле, и учителю Церквей.

Стих: Небеса поведают славу Божию, творение же руку Его возвещает твердь.

Светильники великия Церкви, Петра и Павла восхвалим: паче бо солнца возсияша на тверди веры, и языки зарями проповедания, от неведения возведоша. Ов убо на кресте пригвождься, к небеси шествие творя, идеже Царствия ключи от Христа прият: ов же мечем усечен быв ко Спасу отшед, по достоянию ублажаются, и оба Израилю возвещают, яко на Самаго Господа неправедно руце простерша. Темже молитвами их Христе Боже наш, на ны шатающияся низложи, и православных веру утверди, яко Человеколюбец.

Слава, глас 6:

[Ефрема Кариа:] Праздник радостен возсия концем днесь, всечестная память премудрых апостол, и верховных Петра и Павла. Темже и Рим срадуется ликовствуя, в песнях и пениих. Празднуем и мы, братие, всечестный сий день совершивше. Радуйся Петре апостоле, искренний друже твоего Учителя, Христа Бога нашего: радуйся Павле вселюбезнейший, и проповедниче веры, и учителю вселенныя: яко имея дерзновение, супруже святоизбранный, Христа Бога нашего молите спаситися душам нашим.

И ныне, Богородичен:

Творец и Избавитель мой Пречистая, Христос Бог из Твоих ложесн прошед, в мя оболкийся, первыя клятвы Адама свободы. Темже Ти Всечистая, яко Божии Матери же и Деве, воистинну вопием немолчно: радуйся ангельски, радуйся Владычице, предстательство и покрове, и спасение душ наших.

На благословении хлебов

Тропарь, глас 4:

Апостолов первопрестольницы,/ и вселенныя учителяе,/ Владыку всех молите,/ мир вселенней даровати, // и душам нашим велию милость //

дважды: и Богородице Дево: единожды. И чтение.